



ANGGOTA polis membawa empat lelaki yang menghadapi tuduhan rogol di Mahkamah Sesyen Melaka semalam.

Empat sekawan mengaku tidak bersalah

# Rogol beramai-ramai di lapangan terbang

+ Oleh DIYANATUL ATIQAH ZAKARYA

**MELAKA** – Empat rakan termasuk dua remaja di bawah umur dihadapkan ke Mahkamah Sesyen di sini semalam atas pertuduhan melakukan rogol secara berkumpulan di lapangan terbang kecil di Jasin dekat sini pada Ahad lalu.

Mereka ialah Khairul Asnawi Rusri, 19, Muhammad Firdaus Noor Apende, 18, serta dua lagi masing-masing berusia 16 dan 17 tahun.

Keempat-empat tertuduh bagaimanapun mengaku tidak bersalah bagi pertuduhan itu yang dibacakan di hadapan Hakim Nariman Badruddin.

Mereka secara bersama-sama didakwa melakukan rogol berkumpulan ke atas remaja perempuan berusia 17 tahun pada pukul 4 pagi, 17 Julai lalu di Lapangan Terbang Aerodrome Sungai Rambai dalam daerah Jasin.

Sabit kesalahan, kesemua

tertuduh boleh dipenjarakan tidak kurang 10 tahun dan tidak melebihi 30 tahun mengikut Seksyen 375B Kanun Keseksaan.

Sementara itu, Khairul Asnawi turut didakwa atas pertuduhan melakukan amang seksual fizikal terhadap mangsa sama pada waktu, tempat dan tarikh sama.

Bagi perbuatan itu, pemuda tersebut didakwa mengikut Seksyen 14(a) Akta Kesalahan-kesalahan Seksual Terhadap Kanak-kanak 2017 yang membawa hukuman penjara maksimum 20 tahun dan sebatan.

Terdahulu, Timbalan Pendakwa Raya, Siti Bahiyah Amir Haidi tidak mencadangkan jaminan bagi kesalahan rogol, namun memohon ikat jamin RM20,000 dengan dua penjamin bagi kes amang seksual fizikal.

Peguam Chua Yong Yi bagaimanapun merayu jaminan dibenarkan dengan alasan Khairul Asnawi adalah anak sulung yang membantu keluarga men-

jaga tiga adiknya selain bapanya bekerja di kilang papan.

Katanya, Muhammad Firdaus pula mempunyai adik berusia 12 tahun, manakala anak guamnya yang berusia 17 tahun pula kematian ibu dan bapanya dalam kemalangan jalan raya pada minggu lalu.

Seorang lagi tertuduh berusia 16 tahun merupakan anak bongsu dan bapanya menghidap penyakit jantung.

Mahkamah membenarkan Muhammad Firdaus dan tertuduh berusia 17 tahun diikat jamin RM7,000 setiap seorang, manakala RM5,000 bagi tertuduh berusia 16 tahun.

Khairul Asnawi pula dikenakan ikat jamin sebanyak RM14,000 bagi kedua-dua pertuduhan yang dihadapinya.

Mereka berempat juga dila-rang mengganggu mangsa dalam apa jua keadaan sehingga kes selesai dan menetapkan 16 Ogos ini untuk sebutan semula kes serta serahan dokumen.